

	589195
BIBLIOTHECA UNIV. JAGELL. CRACOVENSIS	Mag. St. Dr. <span style="border: 1px solid black; padding: 0 5px;">III</span>

kal komp



Biblioteka Jagiellońska



stdr0000366



2 exempl  
89 vol 4109 5930  
M. SIMONIS HALICI  
*S. Th. Bacc: ac Professoris,*

# ORATIO.

Post disputatam de Iustificatione  
Quæstionem,

*HABITA EX MORE,*

In Concione Academica,  
ad Ædem S. FLORIANI,

Pro Feriis Exaltationis S. Crucis,  
*Die 19. Septemb. Anno D. 1619.*

N V N C

Vt esset iuris & vsus publici, eruta è tenebris,

Operâ & studio

M. JOANNIS CYNERSKI  
RACHTAMOVII,

*S. Th. Sentent. Can: Cracouien. & ad Sanctorum  
Omnium Præpositi,*

Fasciam de Charitate  
ad disputandum pro-  
ponentis,

*Anno Domini, 1653.*

30. II 46. 1  
CRAC. Apud Viduam & Heredes Francisci Cæsarij, S.R.M. Typ.



D. Bernardus,

Feria Quarta hebdomadæ poenofæ.

**M**irabilis Passio tua Domine IESV, quæ passiones omnium nostrum propulsavit! propitiata est omnibus iniquitatibus nostris, & nulli unquam petitioni nostræ inuenitur inefficax. Quid enim tam ad mortem, quod non tua morte soluetur?

Et infra: Propter nimiam quidem charitatem suam, quâ dilexit nos Deus, ut servum redimeret, nec Pater Filio, nec sibi filius ipse pepercit. Verè nimiam charitatem, quia & mensuram excedit, modum superat, planè supereminens uniuersis. Maiorem (inquit Ioannes cap: 15.) charitatem nemo habet, quàm ut animam suam ponat quis pro amicis suis. Tu maiorem habuisti Domino, ponens eam etiam pro inimicis! Cum enim adhuc inimici essemus, per mortem tuam, & tibi reconciliati sumus, & Patri. Que nam alia videbitur esse, vel fuisse, vel fore huic similis charitati? vix pro iusto quis moritur, tu pro impijs passus es, moriens propter delicta nostra; qui venisti iustificare gratis peccatores; seruos facere fratres, captiuos coheredes, exules Reges.

Mag. St. Dr.



Bibl. Jeq.

1974 012 143 St. Dr.





# ORATIO.



**S**I quis vestrum expectat Auditores, quodnam dicendi argumentum meæ sit Orationi daturus, consideret ipse secum diligenter, quid præsens temporis conditio, quid locus iste sacer, quid frequentissimus doctissimorum hominum conuentus à me exigat: non dubitabit credo, quid me dicere conueniat, cum quæ mihi persona sit imposita, & in quibus rerum asperitatibus versemur, cogitauerit. Gloriosum Crucis triumphum paucis ante diebus egimus, eiusdem celebritatis illustres ferias, continentiae libamine, peccatorum detestatione, gratiarum recordatione honoraturi in locum hunc conuenimus. Doctrina hæc est Ecclesiæ, autoritas Patrum, mos nascenti adhuc Academiæ commendatus, vt Domino per poenitentiam conciliati, singulis quatuor anni temporibus, pro singularibus in nos & in Regnum vniuersum beneficijs, singulares gratias referremus. Adsumus igitur iustissimum deuotionis nostræ soluturi debitum: vtinam cum mente pura & sancta, si fortè illuminet vultum suum super nos, & faciat misericordiam cum seruis suis misericors & miserator Dominus. At vereor, vt signaculum similitudinis suæ in nobis agnoscat; lumen sanctissimi vultus ipsius, scelerum foeditate deformauimus: multa in Deum, multa in homines, multa in nosmetipsos impiè ac nefariè commisimus: quorum omnium singularem à nobis poenam immanis atque importuna barbarorum crudelitas exposcit. Terret nos Maiestatis diuinæ contemptus, minatur periculum domus Dei irreuerentia, ad supplicium



cium vocat nos ambitio, cupiditas, iunocentum sanguis, ebrietas, immundicitia, & mille alijs furijs atque terriculamentis iustissimo Dei iudicio animi nostri excruciantur. Est in foribus Regni alter Attila, Tamerlanes alter, qui nobis Patriæque nostræ charissimæ incendium, gladium, populationem, seruitutem, mortem denique ignominiosissimam insolenter ostentat. Sub nubibus adhuc est inclyta Germania, natat in sanguine Catholicorum (væ nimium nobis vicina) Vngaria. Quid igitur inter tot tantosque malorum incursus agemus? Clamabimus fortè in cælum? at Ethnicorum legislator ait: Soli innocentiae patere aurem Dei. An verò iterum ad Crucem Christi, vt liberalissimum misericordiae symbolum confugiemus? hoc alterum factu optimum: cum cruce enim nobis præuaricatoribus venerunt omnia bona, peccatum extinctum, infernus spoliatus, resurrectio donata, paradysus apertus, hæreditas filiorum Dei concessa, per hanc ex vetustate peccati in nouitatem innocentiae transiuimus. Cæterum, hoc certissimum nostræ salutis asyllum penitus ex oculis nostris sublatum est, ad nostra quotidie seu vtilia, seu iucunda vacamus, quæ sunt Iesu Christi non cogitamus: Crucem vt grauissimum malum omnes exhorrescimus, conculcamus alij, sepelimus alij, latronum crucibus permiscemus alij. Quod cum certissimam nobis, Regnoque huic florentissimo portendat perniciem, ne fortè in nos effundamus indignationem Domini, Crucem ego quærendam inprimis & exaltandam esse censerem. Modum querimus? Patres S. diuino Spiritu locuti nobis eum suggerent. Quoniam verò de Cruce optimè dicitur, cum cruce, petamus à Domino labori nostro successum per solennem Ecclesiæ Antiphonam. *Per signum Crucis, &c.*

Video in ipso orationis meæ initio, multorum ora atque oculos à me auerti, quosdam concidere animis, quòd præter expectationem omnium, eam mihi ad dicendum materiam sumpserim, quæ licet sit mysterij magnitudine præclara, vsu tamen & tractatione frequenti valdè popularis. Crucis enim inquisitio quorsum proponitur, si hæc est rerum humanarum necessitas, vt ne momento quidem sine aliquo insigni animi vel corporis cruciatu viuatur. Vita nostra quid est aliud, nisi ærumnarum & dolorum perpetua quædam arena? Ipsi necessitati corporis  
continuò



continuò seruire, magna est molestiarum acerbitas. Frigemus? vestimenta sollicitè quæruntur; famescimus? arte, insidijs, labore cibi veniunt; in æstum incidimus? umbras & frigus desideramus. Vt valetudinē serues integram, aut attritam sarcias, vel denique amissam recuperes sumptu, cautione, moderatione, dolore, periculo opus est; his nihilominus superatis, morti cedendum est. Quantis emitur sudoribus alicuius disciplinæ cognitio? & tamen ægrè in aliquo claritatis gradu constiteris, ei qui sequitur cedere debes, opinio tua tecum est, laus est aliorum. Ascripsit nos in aliquem virorum cætum seu indigentiae metus, seu iucunditatis aut dignitatis spes, quot sunt cum quibus viuitur, tot quotidianæ cruces: ferendis enim aliorum infirmitatibus constituitur vitæ societas! Quibus cor ad redamandum aperimus, hi plerumq; illud exulcerant; à quorum coniunctione nos seiungimus, illorum vincimur beneuolentiâ. Oblivisci supernæ illius patriæ, delectari hoc terreno exilio, sufferre labores, exorbere difficultates, pati indignitatem, pati interni luminis priuationem, idq; ob auri idolum, ob ventris religionem, ob honoris simulachrum, tormenta sunt grauissima. Quid dicam in hac infælici cæcitate cupere, si fieri posset æternitatē? Non iam commemoro publica funera, clades, inundationes, ciuiliū dissensionum fluctus, hostium incursiones, populationes, vexationes, & illorum fortunam miserè splendidam, qui portant orbem? qui ibi gemitus? quæ suspiria? quæ lamenta non regnant ex regnis. Et quærendam esse dicimus crucem, quæ vbique præstò est? Ita procul dubio: quæ enim quotidie ferenda veniunt, imaginem crucis multa referunt, admodum pauca veram crucem. Scilicet vt lapsi de cælo ignes, aut accensæ in aëre faces, stellarum fulgorem persæpe mentiuntur: sic istorum quæ nos in vita exagitant vel percellunt, sæpe numero decipimur imaginibus. Ferrè iniuriam, opes contemnerè, honorem non mirari, si maius lumen desit, Ethnicorum sunt bracteata monilia, nobis detrimenta. Quid? an non Antisthenes potuit vultu cōstanti ferre oris à quodam petulantiori homine contusionem? potuit. Heraclitus non regales diuitias spontè proiecit? proiecit. Plato etiam à ciuili splendore in Academiâ fugit, bibit innocentia Socratis cicutam, ascendit in rogam animosus Hercules, desiluit in Euripum Aristoteles: Sed cur?



vt sciret posteritas. Flammula quædam gloriolæ in leuitate ani-  
mi falsum ignem accenderat, qui euauit mox cum sua mobili-  
tate. Qui sequuntur Deum non ambulant in his tenebris, sed  
quærunt lumen vitæ, ad dirigendos pedes suos in viam pacis.  
Proferes ergo fortè Iobum vel Tobiam, aliosque Dei amicissi-  
mos, quorum nomen viuuit à generatione in generationem, qui  
orbitates, exilia, ægritudines, inimicorum imperia, & quic-  
quid in vita potest aduersitatis accidere, æquissimo tulerunt  
animo. Percutitur enim Iobus, ecce canticum nouum occinit:  
*Sit nomen Domini benedictum.* Eripitur aspectus Tobia viro ab  
infantia in oculis Domini integerrimo, audite quid dicat: *Iu-  
stus es Domine, & omnia iudicia tua iusta sunt, & omnes viae tuae  
misericordia & veritas.* Sunt fateor splendidioris animi argu-  
menta, agnoscere humiliter, nihil rerum nostrarum apud sum-  
mam rationem expers rationis esse, relinquere arbitrium ei  
qui nobis omnia dedit, lucri loco habere, quod multò ante non  
accepit: ea tamen cum Christianorum cruce comparata ma-  
gnam patiuntur obscuritatem. Multò enim splendidior est  
Christi Crux, quæ sola rectè dicitur norma & regula lauda-  
bilium actionum, caput & origo beatitudinis nostræ, libertas &  
corona nostra. Habet enim secum virtutem & sapientiam, non  
virium humanarum magnitudine, aut cogitationum sublimitate,  
non copiarum splendore, aut verborum magnificentiam su-  
perba, sed potentia infirmitatis, altitudine stultitiæ, diuite pau-  
pertate, verbi abbreviatione nimium absconditam ante sæcula à  
Deo gloriam. Sapienter ea de re Magnus Leo Pontifex  
Romanus: *Exaltatus,* inquit, *Christus Iesus in ligno, reuertit  
mortem in mortis autorem, & omnes Principatus aduersasque  
virtutes per obiectionem passibilis carnis elusit, admittens in  
se antiqui hostis audaciam, qui in obnoxiam sibi sæuendo na-  
turam, etiam ibi exactor ausus est esse debiti, ubi nullum potuit  
inuenire vestigium peccati.* Euacuatum est igitur generale vè-  
ditionis nostræ & lethale chirographum, & captiuitatis pactum  
in ius transijt Redemptoris. Clauis illi, qui manus Domini pe-  
desque transfoderunt, perpetuis diabolum fixere vulneribus,  
& sæuentium pæna membrorum, inimicarum fuit interfectio  
potestatum, sic suam Christo consummante victoriam, vt in  
ipso & cum ipso omnes qui crederent triumpharent. Quid ho-  
rum



rum simile omnes in vnum congestæ cruces habuerunt? si per hanc vnâ vitæ nostræ reparatio facta est, per quam non quod non erat factum est, sed quod perierat renouatum est. Opus hoc diuinæ sapientiæ fuit excellentissimum, in manu forti & brachio excelso, quando è crudelissima spiritualis Ægypti seruitute, infinita iustorum educebatur multitudo. Non enim vnus sæculi præstantes viri in opimis spolijs gloriosi triumphatoris numerabantur, sed omnes à primo Abele vsq; ad vltimum fidelis Abrahæ semen: siquidem eiusdem est fidei, eiusdem spei ædificium, quicquid per mediatorem Dei & hominum Christum Iesum, vel nos confitemur factum, vel Patres nostri credidère faciendum. Quis verò crederet altitudinis diuitiarum sapientiæ & sciētiae Dei, crucem fuisse in monte Caluariæ erectam, per quam & ad felicitatē rediremus, & multò illustriora quàm sperare potuimus, bona caperemus. Istud tamen in cruce peractum est, quando propositus ab æterno propitiator sanguine suo Deo Patri satisfaciens, omnes inter hominem & Deum sustulit inimicitias, paci cælum & terram restituendo. Quod mysterium ignorant illi, qui in Christū Baptizati, Christum in regeneratione sua induentes, ijs quibus renuntiauerūt, non sine grauissimo perfidiæ scelere adhærent sacrilegi. Quid enim Christiani nomen vsurpamus, & Christi carnem innobis nec cognoscimus, nec veneramur? *Qui Christi sunt crucifixi* *carne cum omnibus concupiscentijs suis, complantati similitudini mortis illius,* vt destructo semel corpore peccati, amplius non peccato, sed Christo viuerent. Quid est Christo viuere? crucem seu mortificationem Christi in corpore nostro circumferre, vt vita illius manifestetur, in operibus nostris. Hæc autem est expressio vitæ ipsius, si mandata Domini cum integritate fidei obseruamus, veri Abrahæ filij effecti, concorporati & congenerati Domino nostro, vt membra capiti. Natura enim humana in tanto vnionis nexu, à Filio Dei suscepta est, vt non solum in illo homine, qui est primo genitus totius creaturæ, sed etiam in omnibus Sanctis suis, vnus idemque sit Christus: & sicut à membris caput, ita à capite membra diuidi non possunt. Huius arctissimæ coniunctionis & beneuolentiæ, crux est symbolum certissimum. Quod si conformamur huic sæculo, si tollentes membra Christi faci-



mus ea mēbra meretricis, seu peccati, si à suauissimo iugo Domini transfugimus ad crudelem diaboli seruitutem, crucem amisimus, vitam amisimus, in veterem Adam recidimus. Et mirum, quòd inter tot asperitates, miserias, ærumnas concludamur? imò mirandum magis, quòd in tantis positi malis, vix aliquid nobis mali imminere sentiamus. Nemo est qui cum regio vate clamet; *Erraui sicut ovis quæ periit, quære seruum tuum. Infixus sum in limo profundi, & non est substantia. Omnes declinauimus, omnes inutiles facti sumus, non est qui faciat bonum, non est usque ad vnum.* Omnes nihilominus nos iustos, laudatos, sine suspicione aut reprehensione esse existimamus. Qui certè insignis est error noster: nam quotumquemq; reperies, cui nihil virtutis adijci, aut vitij auferri oporteat, cum & aduersa noceant, & secunda corrumpant, nec minus sit periculi carere desideratis, quàm abundare concessis. Insidiæ sunt in diuitiarum amplitudine, insidiæ in paupertatis angustiiis: illæ enim eleuant ad superbiam, hæ incitant ad querelâ. Propensa in luxuriam sanitas, molestissima iufirmitas, nec licet quenquam sine suspecta iucunditate viuere, quia non licet purum esse quenquam, propter rerum sine quibus vita non ducitur impuritatem. Illud verò quanti laboris est, mobilitatem cordis à peccato continere, & cum vndique innumeræ voluptatum illecebræ blandiantur, ad nulla contagia vigorem laxare. Huiusmodi rerum varietas, in humanis actionibus sæpè crucem Christi, è manibus homini quantumuis cauto eripit. Fælix qui elapsam toties quærit, atque inuentam tollit, & sequitur Christum. Saluator enim noster Dei Filius, vniuersis in se credentibus, & Sacramentum condidit, & exemplum, ut vnum apprehenderent renascendo, alterum sequerentur imitando. Iustus enim Christi ex fide incrementum, ab exemplo vitæ donatoris fidei perfectionem accipit iustitiæ. At fortè molliùs quispiam educatus obstrepat: Seueriorem istam vitæ institutionem ad exemplum Christi, consilij potius esse, quàm Præcepti, hominibusque ad Apostolicam perfectionem contendentibus, non cuiuis passim Christiano familiarem esse debere. Falleris multum, delicatule: sicut enim nemo est credentium, cui dona negentur gratiæ, ita nemo est, qui non sit Christianæ debitor disciplinæ; quia etsi remota est iustitiæ asperi-



asperitas, voluntariæ tamen obseruantia creuit utilitas. Non  
religiosis tantum, sed omnibus nobis dicitur: *Si quis vult ve-  
nire post me, tollat crucem suam, & sequatur me.* Quæro ego.  
An cupiamus venire post Christum? nemo arbitror erit ita  
omni ratione destitutus, qui nolit ibi esse, vbi est omne bonum,  
vbi torrens voluptaris fluit perennis, vbi illarum deliciarum  
secura & perpetua est fruitio, quas nec oculus videre, nec au-  
ris audire, nec cor hominis comprehendere potest. Subijcio  
modum veniendi: *Abnega teipsum. tolle crucem tuam.*  
Subolfacio multis sermonem istum esse durum, multi verba  
Domini vel non percipimus, vel surda aure accipimus. Philo-  
sophi eiusdem de eodem prædicationem arctissimam & primam  
esse dicunt, neque quicquam opponi magis ei quod est, quam  
negationem eius quod est, contendunt. Medici aiunt sibi di-  
ctum esse à Christo: *cura teipsum*, non nega te ipsum. Iuris-  
peritorum omnis labor est de *Meo & Tuo*, de possessionibus, cor-  
poribus, honoribus perpetuò dimicare, de ijs quæ intra sunt  
vix aliquando cogitant. Abnegationem illi mortem appel-  
lant civilem, ideo veluti turpitudinem fugiendam esse cen-  
sent, cumque de omni iure humano ac diuino respondere sint  
paratissimi, hoc sæpius integrum nobis relinquunt Theolo-  
gis. Cæterum & nos affluere, cognosci, celebrari, vel pro-  
pter Ecclesiasticæ dignitatis auctoritatem, vel propter aduer-  
sarium potentiam plerumque cupimus. Quod si horum ni-  
hil est, non video, cur effectum affectu, veritatem quæsitis co-  
loribus obducamus. Nos igitur duces aliorum qui sumus, tre-  
pidamus aut cæcutimus? & miramur alios tergiuersari, qui  
nec quid sit sequi Christum, aut tollere crucem, cogitant, aut  
considerant. Itane dubitamus, cur Dominus noster proposito  
sibi gaudio in splendoribus sanctorum ante Luciferum & ante  
sæcula genitus descendit de cælo, pauperiem, labores, contu-  
melias, crucis denique ignominiosissimam mortem sustinuit?  
An vero ut crucem fugeremus? imò ut voluntariè crucem  
quæreremus: cum enim sit ille via, per quam ad veritatem,  
inde ad vitam veniamus, oportet nos eandem quam ille triuit  
orbitam terere. Quæsiuit ille crucem per annos triginta tres  
ac amplius, cur nos exosam habeamus? quærunt homicidæ,  
idololatræ, luxuriosi, auari, querit omnis improbitas crucem:

C

quid



quid enim magis excruciat, vt molestissima vitiorum seruitus? cur nos iugum Christi suaue, & onus illius leue, à capite & cervicibus nostris propulsamus, & ad indulgendum carni adeò flectimur? Quid nobis venter reddat, qui tot regales mensas consumpsit, tot veteris falerni dolia exhaustit? dolorem & corruptionem. Quid inanis gloria? liuorem & inuidiam. Quid auaritia? curam & solitudinem. Quid intemperantia? gehennam & mille morbos, & hoc nobis vltro accersimus? Crucem Domini quæ nos à tot tyrannis liberat, & in statu vitæ felicissimo ponit, repudiamus? Respondet quispiam, cuique nostrum in Ecclesia Christi, Crucē esse impositam, est sub quo ingemiscamus: si enim nondum crucem portamus, nondum capimus esse Christiani, symbola nostræ professionis qua distinguimur à gentibus, crux est. Non eo inficias: à vita enim nostra ne momento quidem abest tribulatio: sed vereor ne simus illis similes, qui cum cornua gerant, cornua quærunt. Amamus hanc vitam, profectò nescimus crucem esse in humeris nostris: qui enim nescit se hic peregrinum esse, non sentit crucem, neque anxius de patria, suscipit cogitationes aut sermones de paterna domo. Assentior ita esse, cuique nostrum crucem imponi, vt compatiētes conglorificemur, sed nos in luctu risum, in labore otium, in palæstra quietem quærimus, nescientes vitam hominis militiam esse super terram. Norunt omnes qui piè viuere volunt sociam esse perpetuam vitæ Christianæ crucem, & nos si sapere nobis videmur, nosse omnino debemus. Postquam enim nobis imposita est persona hominis Academici, cum præstantia multorum aliorum, postquā iuuentus regni huius florentissimi concredita, vt studio, fide, labore, diligentia nostrā, maiora in dies incrementa & ornamenta pariat suæ Reipublicæ, credite mihi, grauissima est ista crux. Videre licet toties cum ipso onere claudicare alios, incuruari alios, in ipsis initiis cadunt multi, in medio ætatis flores quærunt valetudinem plurimi. *Ferreus sis aut aneus, si bonum commune tibi est cordi, si locum & personam tuam cogitas, si officij Academici rationem expendis, frangas citius vires quàm vocationi respondeas necesse est.* An tibi parua contentio videtur, ad summum virtutis & sapientiæ culmen niti, vt ex eo dissipes aliorum tenebras, errorem corrigas, præclaro  
vitæ



vitæ instituto in admirationem tui rapias. Multo hic pallore,  
 multo sudore, multis vigiliis, multis mortibus opus est. Ma-  
 gna est ô Academici nostra crux, si nobis, si opinioni homi-  
 num, si voluntati diuinæ satisfacere, si in vltima die iustissimā  
 mercedem à magno Patrefamilias repetere cogitamus. Quò  
 magis miror, quòd plerique eam non videamus, vel aliam  
 quàm quæ imposita est arbitramur esse. Vertamus nos ali-  
 quando in nos, & diligentius intueamur, nostram ne an Chri-  
 sti crucem feramus: potest enim nostra esse, si dignas factis  
 poenas accipimus, potest & Christi esse, si ad certamen patien-  
 tiæ obiectis tentationum procellis, si ad laboris præmium in-  
 uitamur. Equidem si Christianæ obseruantiae limitem exces-  
 simus, si in officijs publicis non honorem Dei, non iuuentutis  
 comroda, sed nostras sordes quæritamus, sublatam esse crucē  
 à nobis doleamus. Onus enim Babylonis, onus Ægypti feri-  
 mus, seruitutem seruimus durissimam, neque probum cogi-  
 tari potest grauius, cūm Academici generis & seminis propria  
 sit virtus, ex dignitate vitæ quærere gloriam. Habes & tu iu-  
 uentus Academica crucem, reuerentem legum obedientiam,  
 studiosā præceptorū reuerentiā, iucundā studiorū asperitatē.  
 Hanc si excutis, non est, quòd tibi tuisq; aliquid illustre aut  
 splendidū in futurū promittas. Tuum est, motū noxiæ volun-  
 tatis quæsito crucis ligno affigere, atq; cum Propheta identidē  
 clamare: *Confige clauis timoris tui Domine carnes meas, vt à iudi-  
 cijs tuis timeam.* Scire vis quid sit clauis timoris Dei, carnes cō-  
 fixas habere? *Est inquit Gregorius, corporeos sensus ab illecebra  
 illiciti desiderii, sub metu diuini continere iudicij, resistere pecca-  
 to, & concupiscentiam omnem ne quid morte dignum opereris in-  
 terficere.* Est enim quasi vitulus quidam, & is valdē insolens,  
 caro nostra, quam Deo munus acceptabile offerimus, si castā  
 seruamus, si ad ostium tabernaculi, id est, ad diuinorum libro-  
 rum auditionem consuefacimus, si continentiae fræno & di-  
 sciplinæ seueritate iugulamus. Facimus hoc? est testamen-  
 tum Domini super carnem nostram in pactum sempiternum,  
 in militiam Christi adscripti sumus, crucis insigne gestamus,  
 membra quæ olim seruierunt iniustitiæ, impudicitiae, ad iniqui-  
 tatem & immunditiam, vt seruiant iustitiæ, puritati, ad san-  
 ctificationem efficimus. Quod si de die in diem viuere, iucun-



ditates captare, ventri, lateri, ostentationi, & similibus nugis  
seruire cæperimus, crucem penitus amisimus. Qui enim ex-  
to veteri homine, non configuratur corpori claritatis Christi,  
fidelis non est crucifixo. nam vt fidei plenitudo non in cæco-  
rum illuminatione, mortuorum suscitatione, aut prædicatione,  
sed in Christi cruce, obitu, & sepulturâ eluxit, sic ipsa crucis  
efficacia in crucis imitatione splendet. Hæc est inquit Am-  
brosius, fidei gloria, si verè intelligas crucem Christi, aliæ cru-  
ces nihil mihi prosunt, sola Christi crux utilis est, per quam  
mihi mundus crucifixus est, & ego mundo. Si mihi mundus  
crucifixus est, scio quia mortuus est, non diligo eum: scio quia  
præterijt non concupisco eum: scio quia corruptela est, quasi  
fætidum vito, quasi luem caueo, quasi moriturum relinquo.  
Itaq; si gloriæ ducimus in mèbris esse Christi, crucē quæram⁹  
si non habem⁹: habemus? veluti excellenti bono gaudeamus.  
Trahūt alios pictæ atq; momentaneæ voluptates, nobis vna sit  
cura crucis; hîc studia cogitationum nostrarum figamus, in hoc  
volumine sit lectio perpetua, ex eo nostræ meditationes atq;  
discurs⁹ sumant materiâ, hæc officiorū, actionū, totiusque vi-  
tæ nostræ sit mensura, hîc amoris nostri pōdus cōquiescat, hîc  
splēdeat omnis dignitas. Iacēt Platones Idearum figmenta,  
prædicet Stoa elumbem virtutis potentiam, extendat Peripa-  
teticus caducæ felicitatis pomeria caduca, placeant sibi hono-  
ribus Politici, quærat vulgus diuitias; nobis vnum sit studium  
quærendæ crucis Christi. Non timeamus iacturam alicuius  
commodi, non indignitatem aut vitæ periculum; memine-  
rimus Dominum paupertate suscepta diuitias non amisisse,  
gloriam humilitate non minuisse, non æternitatem morte per-  
didisse, imò maximas diuitias, summam collegisse gloriam.  
Vita nostra est in cruce, quid periculum metuimus? altare  
agni tollentis peccata est, quid furorem indignationis diuinæ  
perhorrescimus? signum est salutis, cur desperamus? purgatio,  
sanctificatio, gloria nostra est, cur in eius amplexum non rui-  
mus? O diuinum crucis Sacramentum, in quo hæret infirmitas,  
virtus libera est, affiguntur vitia, eriguntur trophæa. Quis  
dederit, vt in te omnis mens, omnis affectus noster demerga-  
tur: qui enim in te requiescit, non patet insidijs inimicorum,  
sed in iucundissima protectione illius commoratur: qui in te  
pendit,



pendit, protector, ac liberator noster, optimus maximus. In hac olim securitate commorabantur sanctissimæ Christianorum primitiæ, quas non fames, non nuditas, non periculum, non gladius, non vlla persecutorum tempestas potuit diuellere à crucis complexu: tantum enim abest, ut in marem conciderent sævientium tyrannorum machinis, ut eo ipso gauderent & gloriarentur plurimum. Fuit hoc sanè spectaculum maximum, cum terrarum orbis videret, ad illud studiis & affectibus ardentissimis celebrandum atq; exaltandum certatim properari, in quo nihil cernebatur præter scandalum, & stultitiam. Dux & antesignanus eius stuporis fuit Paulus, qui cum videret quasi niuis cumulos, quotidie novas sibi accidere tentationes, ex odio, & insidiis persecutorum, ratus se in medio deliciarum Paradisi esse constitutum exclamat: *Repletus sum consolatione, superabundo gaudio in omni tribulatione.* Gaudium existimauit vincula, rotas, aculeos, quia istis dolorum acerbitatibus sciebat successuram iucunditatem, nullo temporum spatio terminandam. Quippe ut miles in acie, præclara suæ fortitudinis edens facinora, in mediis mortibus & vulneribus mirifice lætatur, quod hæc sit pulcherrima & certissima suæ gloriæ materies; sic Christianorum animi magnorum ducum propositis exemplis, ex ipso calamitatum conflictu illustriorem sperantes victoriam, in maiorem assurgebant lætitiā: atque Domino suo humiles gratias referentes, ipsa tribulatione, ut amplissimo suæ gloriæ pabulo nutriebantur. Hanc virtutis generositatem, cum iniquissimis oculis aspiceret, turpissimus ille Christi desertor Iulianus, ausus est pro consuetâ insolentia & temeritate, magnarum virtutum splendoribus opponere inanes fucos patientiæ, humilitatis, & fortitudinis veterum Philosophorum. Sed infracti animi Episcopus Gregorius Nazianzenus, proferens ex speculo Ecclesiæ purpuratam Christi gratiis virtutis excellentiam, his verbis immanem illam imposturam in ruborem adducit. *Videsne hos pauperes, & lavis expertes, carne ferè & sanguine destitutos, & ideo proximos Deo. Vides hos illotis pedibus, humi cubantes: hos humiles & super infera: hos inter homines & super humana: hos vinculis constrictos, & liberos: retentos, & retineri nescios, quorum nihil in in mundo, & omnia quæ supra mundum sunt.*



*Viuunt hi in morte vitam immortalem: & soluti à carne cum  
supremo spiritu unum sunt, contempti à mundo in Dei amicitiam  
transierunt: quorum rupes, & quorum celi: quorum sunt  
abissi, & quorum throni: quorum nuditas, & quorum incorru-  
ptibilitas indumentum: quorum solitudo & quorum seculi  
alterius celebritas: qui voluptates contempserunt, & tamen  
verissimis perpetuò fruuntur: qui semper ascendunt, & ascen-  
sionis suæ modum non norunt. Hoc erat illud genus electum,  
gens sancta, populus acquisitionis, qui crucem Domini super  
aërem, super omnes cælos exaltabant: & nos multum degene-  
res, quamuis ab eadem stirpe nati, vix trementi manu illam  
retinemus. Quid si procella persecutoris ingruerit? quid si  
ferrum, ignis, exilium, proposita fuerint. Quid si hæresis? si  
Machometes gladium in ceruices nostras strinxerit? cogita-  
mus quo animi robore simus futuri, repenti à deliciis, à com-  
moditatibus, ab opibus, ab honoribus abrepti. Sed non sit à  
persecutore periculum, non timeamus quæ vicini nostri pati-  
untur: multa occurrunt in quibus exaltare possumus crucem  
Christi. Stemus aduersus gloriam, contemnamus falsam de  
nobis opinionem, superbiam conculcemus, iram comprimamus,  
concupiscentiam extirpemus, denique vocatione nostra  
in qua nos Deus posuit nomen Domini sanctificemus. Profe-  
ramus illam animi excelsitatem, dicentes cum Apostolo: *Ma-  
gnificetur Dominus in corpore meo, siue per vitam, siue per mortem,  
quia anima mea illi viuet, illi viuit, illi morietur, illi me debere a-  
gnosco quicquid in me cognosco.* Atque hæc est altissima crucis exal-  
tatio in mediis tribulationibus, cum gratiarum actione gloria-  
ri. An verò non est (inquit Bernardus) cur glorieris in tribula-  
tionibus, si ex spe certissima venit gloria. *Cum ipso sum* (in-  
quit Dominus) *in tribulatione, sperauit in me, eripiam eum &  
glorificabo eum.* Quid optatius potuit contingere tribulati-  
one, quæ exercet ad retinendum amorem Domini, probat ad  
illustrandam fortitudinem viri? Adhuc nè in aduersis Ethni-  
corum more, querelas instituemus? nobiscum est qui erigit  
lapsos, soluit compeditos, diligit iustos, cur non potius con-  
uertimur ad Dominum, & incipimus aliquando solliciti esse de  
animabus nostris? memores vitam hanc pænitiæ esse, non  
præmiorum: cur non ferimus crucem cum gaudio & exultati-  
one?*



8  
one? scientes illorum tantum esse fructus, coronas, præmia, quorum labores, curricula, certamina fuerunt. Est in manibus nostris ex hæresi, est ex barbarie infidelium victoria, quia apud Patrem cælestem habemus aduocatum nostrum, Iesum Christum, qui voluntatem timentium se consuevit facere. *Ille ipse apprehendet arma & scutum, adiutor fortis, & disperdet inimicos nostros, saluabit nos in dextera & brachio Sancto suo.* Quid tum? etsi fecerit quod est bonum in oculis suis, siue ponat in cruce, siue sub cruce, Dominus est; exaltare nomen eius nihilominus debemus. Hæ enim sunt primitiæ gloriæ, in quibus fructus vitæ futuræ ut in semine continetur. Nostra verò Academici ex cruce gloriæ certissima, si quantum potuerimus, in ea exaltanda laborauerimus. Ocium non speremus, nec spectemus: nisi enim omnes ingenij, industriæ ac diligentiae nervos intendimus, crucem cōmutamus. Væ si quibus parata est cum cruce corona, supplicium nostrā nobis negligentia accersimus. Nam cū aliis dicere liceat, quid meā, quod iste vel ille in exitium ruat, nobis id non licet, qui sal & lux adolescentiæ regni istius nobilissimi dati sumus. Nostrum est fulgere sapientiā & doctrinā, ut cæteri videntes, glorificent Patrem qui in cælis est. Absit ut anima legem Dei sciens, aliquem contemnat ex his pusillis, & velexemplo suo interimat, vel ruere in præceps patiat. Præstiterat huiusmodi hominē nunquam natum fuisse. Proponamus quæso diligenter, ut non solum quod debemus faciamus, sed præterea ad honorem Dei actionum nostrarum præstantiā extendamus. Crux à Domino nostro magno cum amore suscepta illustravit mundum vniuersum: crux laborum nostrorum cum gaudio tolerata, nouam semper & inculpatam faciet Academiam. Orabit mater Virgo Filiū, ut grauissimum hoc nostræ vocationis pōdus, sit nobis instar fasciculi myrrhæ. Apex Theologorum, patronus Academiæ Paulus, flectet ad Patrē Domini nostri genua, ut det nobis secundum diuitias gloriæ suæ, virtute corroborari ab alto, per spiritum suum, in interiori homine, Christum Dominum habitare in cordibus nostris, per fidē, ut in charitate radicati & fundati possimus comprehendere cū omnibus Sanctis, quæ sit latitudo, & lōgitudo, sublimitas, & profunditas, scire etiam super eminentem scientiæ charitatem Christi, ut impleamur in omnem plenitudinem Dei.



Colligitis figuram crucis mei Academici? vestra est, vobis eam magnus Doctor depinxit. Cur enim tam sollicitè sublimitas, latitudo, profunditas exprimitur? An non videtis vt Rectores nostri arcem illius occupant? Quid enim est, quod tanta cum humilitate & facilitate excellentem dignitatem suam ad nostros vsus accommodant? nisi quod sublimitatem crucis suæ, altissimæ contemplationis, charitatis, prouidentia notam esse norunt. Nostri igitur Abimelechi, nostri duces veluti Machabæorum Angeli prodibunt, ferentes impositum humeris suis lignum: & nos quod illi faciunt non aduertimus? Nostra est Professores post sublimitatem latitudo, quam apprehendimus, si dilatato corde, hoc est magno & amplo caritatis affectu iuuentutem nobis commissam ad ea, quibus olim Reipublicæ, vel Ecclesiæ profit amplectenda excitemus. Tu iuuentus optima crucis pedem, erue de profundo terræ, integris adhuc viribus, certa cum humilitatis profunditate, cum innocentia, exere lacertos tuos, vt ex gloriosis laboribus nomen tuum quotidie fiat illustrius. Subijciamus iam omnes cum Deo nostras manus fælicissimæ arbori, erigamus laborum nostrorum pignus preciosissimum, leuemus pactum & testamentum Domini super nos, exaltemus vsque ad montem, certemus vsque ad excellentiam. Sic florebit vt palma Mater nostra Academia, sic instar Cedri Libani multiplicabitur. Multiplicabitur adhuc infenecta vberi, & nos benè patientes erimus, donec peracto fæliciter curriculo, occurramus nostro Crucifixo, cum illo ipso promissâ crucis gloriâ coronandi, atque illa supereminente scientiæ caritate, in omnem æternitatem & plenitudinem

D E I adim-

plendi.









